

# Il rivièl de Joibe Grasse e la Zornade Furlane dai Dirits



Ai 27 di Fevrâr dal 1511 - la dì de Joibe Grasse - si invie a Udin il plui grant rivièl populâr de storie dal Friûl. Si trate de prime des gruësis rivoltis contadinis che a scjassin la Europe centrâl vie pal secul XVI e de uniche a Sud des Alps.

Tra lis causis plui impuartantis dal rivièl si àn lis tensions sociâls che a vevin tacât a cressi za te seconde metât dal secul XV par vie che i cjastelans a cirivin di cambiâ a lôr vantaç i rapuarts economics cui contadins, di slargjâ i lôr podês te aministrazion de justizie e di imparonâsi des comugnins, ven a dî lis tieris gjestidis in maniere coletive des comunitâts di pais. I mudaments che i nobii a volevin imponi a menaçavin di savoltâ il sisteme di normis e di dirits tradizionai che a jerin la fonde des comunitâts furlanis. Rivendicâ e difindi i "dirits antîcs" al jere duncje par chestis comunitâts la uniche maniere par difindi la lôr autonomie e la lôr identitât.

Lis tensions sociâls si incrosavin po cu la faide tra Strumîrs e Çambarlans.



I prins a metevin adun la plui part dai nobii furlans, a controlavin il Parlament de Patrie dal Friûl e a vevin leams une vore strents cul Imperi, vuidât ta chei agns di Massimilian di Asburc. I Çambarlans invezit si devin dongje ator de famee dai Savorgnans - la plui siore dal Friûl e la uniche iscritte ae nobilitât veneziane - e a vevin une gruesse influence sul Comun di Udin e su lis Cernidis, o sei lis miliziis contadinis furlanis.

A ingredeâ inmò di plui la situazion si à la vuere che tra il 1508 e il 1516 e viôt cuintri la Republiche di Vignesie e l'Imperi e che e à propite il Friûl tant che teren principâl di scuintri. Il conflit al è fat plui di scorsadis cuintri dai pais che no di batais in cjamp viert e a paî il presit plui alt a son cuasi simpri lis comunitâts rurâls.

La faliscje che e impie il rivièl si invie ai 27 di Fevrâr dal 1511 cuant che une colone des Cernidis si cjate tal mieç di un scuintri tra i partidants des dôs fazions. I contadins e i populârs udinês, cul jutori dai oms di Antoni Savorgnan, a dan l'assalt ai palaçs dai nobii, ju metin a sac e ju brusin. Par trê dîs la citât e reste tes mans dai ribei. I nobii che no rivin a scjampâ a vegnin copâts. I rîts dal Carnevâl si misclîcin cul lengaç dal rivièl, cui rivoltôs che a sfilin pes stradis de citât mascarâts cui vistîts dai siôrs copâts o in fughe: un episodi che i croniscj di chei agns a piturin tant che un mont sotsore.

Di Udin il rivièl si slargje al rest dal Friûl. I contadins a cjapin e a brusin cjistiei e palaçs ator par dute la Patrie, di Tarcint a Porpêt e di Cergneu a Çopule, di Spilimberc a Voleson e di S. Denêl a Breçà. E se a Udin il rivièl al jere stât segnât a fuart de faide jenfri Strumîrs e Çambarlans, tes campagnis al è leât massime a elements antifeudai compagnâts de rivendicazion dai dirits antîcs.

Ai prins di Març lis fuarcis nobiliârs a rivin a dispierdi une colone di rivoltôs tune bataie sui magrêts de Ciline, intant che i oms mandâts di Vignesie a cuietin la situazion tal rest dal Friûl. A son però la epidemie di gjandusse e il taramot che a rivin pôc plui tart a dâi il colp finâl ae rivolte. Des sôs cinisis e nassarà però la Contadinance, un organism di rapresentance des comunitâts rurâls che nol cjate pareli ator pe Europe.



I storic leâts ai Strumîrs a àn provât a piturâ i rivoltôs tant che pipinots tes mans dal Savorgnan, ma i studis fats tai ultins agns sui documents nus mostrin un quadri diferent. Fûr di Udin, di fat, il rivièl al viôt protagonistis bandis di vuerilie ben organizadis, che a àn imparât a combatî dentri des Cernidis e che, in grazie dai leams intieussûts tra lis variis struturis di



autoguvier des comunitâts rurâls, si movin daûr di ideai comuns. Si à duncje la impression che, cul rivièl, lis comunitâts rurâls a volessin mostrâ che a jerin buinis di difindi ancje cu la fuarce chei "dirits antîcs" che i nobii a cirivin di usurpâ.

Il rivièl de Joibe Grasse si pues alore calcolâu tant che il moment plui alt di un conflit sociâl che al veve lidris plui antighis e che al durarà a dilunc. Al è par chest che, un pôcs di agns indaûr, il Comitât 482 (che al meteve adun lis realtâts furlanis impegnadis pai dirits linguistics) al à proponût chê dai 27 di Fevrâr tant che "Zornade Furlane dai Dirits", plui che une fieste - come chê dai 3 di Avril - une ocasion par resonâ sul Friûl e par rivendicâ il rispîet di chei dirits che dispès a restin dome su la cjarte, a partî di chei linguistics.

**Carli Pup**

Illustrazions di Luigino Peressini

**Par informazions:**  
[www.arlef.it](http://www.arlef.it) - [arlef@regione.fvg.it](mailto:arlef@regione.fvg.it)  
tel. 0432/555812

**Par cure de:**

**ARLEF** AGENZIE REGIONÂLE PE LINGHE FURLANE